



CENTRALE BANK VAN ARUBA

Entrante 1 di september 2023, BCA a reduci e tasa di reserva obligatorio cu 1 punto di porcentahe na 24,5 porciento.

Relato di prensa


Conforme e tarea di e Comite di Maneho Monetario (CMM) pa evalua, determina y duna transparencia riba e accionnan di maneho monetario di Banco Central di Aruba (BCA), BCA ta comunica lo siguiente. Durante e reunion di 21 di augustus 2023, CMM a dicidi pa baha e tasa di e reserva obligatorio na 24,5 porciento entrante 1 di september 2023. Di e manera aki, e banconan comercial mester tene un balansa minimo na BCA cu ta igual na 24,5 porciento di e depositonan riba termino cortico di nan clientenan. E decision pa reduci e tasa di reserva obligatorio na 24,5 porciento ta basa primordialmente riba un caida continuo den e estimacion di likides excesivo di e sector bancario compara cu december 2022, primordialmente causa pa un subida den credito, mientras cu reservanan oficial y internacional ta permanece adecua, apesar di un caida. BCA ta sigui monitoreo e desaroyo den e likides excesivo y lo por dicidi di cambia e tasa di reserva obligatorio, si ta considera esaki necesario.

E CMM a considera e siguiente informacion y analisis den su deliberacion.

Reservanan internacional y oficial

E reservanan internacional, cu ta consisti di reservanan oficial di BCA y reservanan di divisa na e banconan comercial, a baha cu Afl. 78,6 miyon te cu 30 di juni 2023, compara cu fin di december 2022 (Grafico 1). E reservanan oficial a mengua cu Afl. 86,3 miyon, mientras cu e reservanan na banconan comercial a aumenta cu Afl. 7,7 miyon. Consecuentemente, te cu 30 di juni 2023, e reservanan oficial y internacional a suma Afl. 2.704,6 miyon y Afl. 3.162,6 miyon, respectivamente.

Sostene un nivel adecua di reservanan ta esencial pa mantene e tasa di cambio fiho entre e florin Arubano y e dollar Mericano. Teniendo cuenta cu esaki, apesar di e caida menciona anteriormente, reservanan internacional a keda ampliamente riba e rekisito di tres luna di pago riba e cuenta corriente di e balansa di pago den juni 2023. E pagonan riba e cuenta corriente di e balansa di pago ta consisti, entre otro, di pagonan pa importacion, pagonan di interes na inversionistanan stranhero y transferencianan pa exterior manera placa manda afo door di trahadonan stranhero. Reservanan oficial tambe a keda dentro di e margen aceptabel basa riba e metrico 'Assessing Reserve Adequacy' (ARA) di e Fondo Monetario Internacional (FMI) (Tabel 1).



Tabel 1: Metriconan relata na reserwanan observa den 2023

| | jan | feb | mar | apr | mei | jun |
|---|-------|-------|-------|-------|-------|-------|
| Cobertura estima di pagonan riba cuenta coriente ¹ | 7,1 | 7,0 | 6,8 | 6,9 | 6,8 | 6,7 |
| Metrico estima di FMI ARA ² | 106,6 | 105,3 | 109,6 | 113,4 | 112,2 | 110,3 |

¹ E cantidad di luna di pagonan riba cuenta coriente cu e reserwanan internacional ta cubri.

² E proporcion entre e nivel di reserwanan oficial y e nivel minimo adecua (conforme FMI), den porcentonan.


Inflacion

Inflacion, midi na final di luna contra e luna di e aña anterior, a resulta na 2,8 porciento den juni 2023, un caida compara cu 4,0 porciento na mei 2023 (Grafico 2). E 2.8 porciento di aumento den prijs di consumo na juni 2023 tabata causa primordialmente door di e crecimiento den prijs di utilidad, cu a sigui afecta e componente di 'vivienda' (contribuyendo cu 2,5 punto di porcentahe). Tambe e prijsnan den 'cuminda y bebida no alcoholico' a subi (contribuyendo cu 0,7 punto di porcentahe). Na un grado mas abou, 'otro productonan y servicio' (contribuyendo cu 0,4 punto di porcentahe) y 'restaurant y hotel' (contribuyendo cu 0,3 punto di porcentahe) tambe a contribui na e inflacion midi na final di luna di juni 2023 contra e mesun luna di e aña anterior.

E inflacion midi riba promedio di 12 luna a desacelera na 5,9 por ciento na juni 2023, un caida compara cu 6,1 por ciento na mei 2023. E presion inflacionario tabata debi na e nivel eleva di prijsnan di petroleo riba mercadonan internacional, vehiculonan mas caro, y e aumento den prijs di awa y coriente desde augustus 2022. Ademas, Aruba a importa un gran parti di e crecemento den prijs for di su partnernan comercial, particularmente Estados Unidos y Europa.

Mientrastanto, na juni 2023, inflacion basico (excluyendo cuminda y energia) a alcanza 2,3 por ciento si midi e final di respectivo luna contra e mes un luna di e aña anterior (mei 2023: 2,3 por ciento). Basa riba un promedio di e ultimo 12 lunanan, inflacion basico a yega na 1,8 por ciento (mei 2023: 1,9 por ciento).


Grafico 2. Inflacion basa riba e indice di prijs di consumo
(Fuente: CBS, juni 2023)



Likides excesivo

Basa riba data semanal, estimacion preliminar di likides excesivo (incluyendo credito cu no a wordo aloca ainda y otro compromisonan) a suma na Afl. 382,6 milyon riba 28 di juli 2023 y tawata Afl. 437,2 milyon mas abou compara cu fin di december 2022.

Grafico 3: Likides excesivo di banconan comercial
(Fuente: CBA)



Banco Central di Aruba
25 di september 2023